


# Friûl di Jevât

PAR CURE DA LA SOCIETÂT FILOLOGJICHE FURLANE

Vie Ascoli, 1, Guriza - tel./fax 0481533849 - gorizia@filologicafriulana.it - www.filologicafriulana.it



Un incuintri a Viarsa martars ai 28 di Novembar  
e une messe a Lucinîs sabide ai 25

## Memoreant Celso Macor tai 25 agns da la muart

A son passâts vincjecinc agns dai 28 di Novembar dal 1998, cuant che al muri a Guriza Celso Macor, une da lis vôs plui altis dal Nûfcent tal Friûl di soreli jevât.

Par onorâ la memorie dal poete e scritôr tal inovâl da la muart, martars ai 28 di Novembar a lis 8 e mieze di sere inte sale parochiâl di Viarsa, il paîs li che Macor al jere nassût, si fasarà un incuintri par fevelâ dai temis che l'intelutuâl gurizan al veve plui a cjâr: l'amôr pe mont e pe leteradure.

La serade che e à par titul *Un bar di tiara lassaimi*, un viers de poesie *Tun jet di scussis*, e je organizade da la Societât Filologjiche Furlane e dal Comun di Romans cu la colaborazion da la Unitât pastorâl tra lis parochiis di Sante Marie Anunziade di Romans e di Sant Andree Apuestul di Viarsa, dal Circul ricreatif, sportif e filodramatic di Viarsa, dal Grup culturâl di ricerce "I Scussions" e da la sezion di Guriza dal CAI, Club

alpin talian, cu la poie da la Casse Rurâl dal Friûl Vignsie Julie. Par fâ une analisi dai tancj aspjets da la figure di Celso Macor a cjaparan la peraule Marko Mosetti, da la sezion CAI di Guriza, che al fevelarà dal impegn di Macor pe riviste *Alpinismo Goriziano*, che par tancj agns al à direzût, e Gabriele Zanello che cul so intervent *(Ri)leggere Macor nel 2023* al fevelarà da la atualitât dal pinsîr dal poete. L'incuintri al sarà insiorât da lis leturis dal atôr Giorgio Monte.

Cheste serade e scree un percors plurienâl che si sierarà tal 2025, centenari da la nassite di Celso Macor, propit tal an che Guriza e Gnova Guriza a saran capitâl europeane da la culture. Nol è un câs che i temis dal superâ i cunfins e da la fradilance tra i popui a jerin chei plui cjârs a Macor za dal 1965, an da la publicazion di *Isonzo, finalmente fiume di pace*.

Un dai prossims apontaments su cheste strade di riscuvierte e

valorizazion da la opare di Macor e sarà la gnove edizion da la racuelte di poesii *Impiâ peraulis*, par cure di Gabriele Zanello, che e sarà publicade di bande da la Societât Filologjiche Furlane, tant che la prime edizion tal 1980: lis 13 lirichis, scritis par furlan, a vegnin publicadis ancje cu lis traduzioni par talian, todesc e sloven; in plui dai tescj di introduzion di Ervino Pocar e Sergio Tavano, cheste gnove edizion e sarà completade cui saçs di Renate Lunzer, sul rapuart tra Macor e il mont austriac, e dal stes Gabriele Zanello, sui rapuarts cul mont sloven.

Tai agns che a vignaran a saran anjemò tantis lis ocasions e lis iniziativa par ricuardâ la impuartance e la atualitât da la opare di Celso Macor, massime pes gnovis gjenerazions. Cun di plui Macor al sarà ricuardât cuntune messe sabide ai 25 di Novembar a lis 7 di sere inte glesie di S. Zorç Martar a Lucinîs.

## Messâl furlan

### Incuintri

Ai 24 di Novembar  
dopo il "NO" de CEI

"Cui che nol difint lis sôs lidrîs, al dinee la sô stesse identitât", al è chrest il coment dal president da la Societât Filologjiche Furlane, Federico Vicario, dopo di vê savût che il Messâl in lenghe furlane nol è stât fat bon di bande da la CEI, ai 15 di Novembar stâts: la votazion no à vût la maiorance dai doi tierçs, che e coventave pe aprovazion.

"A son secui - al va indevant il president - che lis lenghis regionâls, e in particolâr il furlan, a son presintis inte pastorâl e inte liturgjie da lis glesie dal Friûl. La lôr valorizazion e rapresente un impegn dal dut coerent cul messaç dal Vanzeli". E al zonte: "la valorizazion da la varietât lenghistiche, in rispjet da lis tradizion culturâls espression dal territori, e je un imprest fundamentâl par prudelâ il dialic e la concuardie tra personis, comunitâts e culturis".

Devant di une rispueste che nus lasse plens di maravee e di lancûr, si augurin di podê cjatâ il prin pussibil lis soluzion plui decorosis par che al popul furlan, che al spiete di agnorums, i vegni ricognossût il dirît di preâ inte sô lenghe. Cun chest fin la Societât Filologjiche e clame adun i Furlans e i rapresentants da lis clapis culturâls dal Friûl intun incuintri public, che si fasarà vinars ai 24 di Novembar a lis 5 e mieze sotsere inte sede di palaç Mantica, in vie Manin 18 a Udin. L'incuintri si podarà ancje viodilu in direte streaming sul sît [www.filologicafriulana.it](http://www.filologicafriulana.it)

## Al rive il Strolc furlan pal 2024

# A la scuvierte dai plui biei flôrs dal Friûl

Ogni an, come par tradizion inte di di Sante Caterine, la Societât Filologjiche Furlane e presente il Strolc furlan pal an gnûf.

L'apontament al è par sabide ai 25 di Novembar a lis 5 sotsere tal palaç Mantica in vie Manin 18 a Udin, ma la presentazion si podarà viodile ancje in direte streaming sul sît [www.filologicafriulana.it](http://www.filologicafriulana.it).

Joibe ai 21 di Dicembar, invezit, simpri a lis 5 sotsere, il Strolc al vignarà presentât a Guriza, in Cjasa Ascoli. La edizion pal 2024 e je stade metude adun di Dani Pagnucco e e compagnarà i letôrs par dut il 2024 cun contis, poesii e rubrichis scritis tes diversis varietâts dal furlan: tra i tancj autôrs o ricuardin Gianni Colledani, Angelo Floramo, Laurin Zuan Nardin e 12 scritôrs da la Cjargne pe rubriche "Linda cjargneta". I dissens a son di Annalisa Gasparotto e Oriana Cocetta. Il Strolc pal 2024 al presente mêns par mêns une bieleschirie di flôrs che a cressin inte nestre region: cutuardis speciis fotografadis di Serena Chiapolino e descritis di Alberto Candolini, sieltis tra lis cirche 3500 che o vin sul

Al sarà presentât  
ancje il Lunari  
da la Filologjiche  
stampât chest an  
ancje in version di taule

nestri  
teritori.

Si à sielt prin di dut lis plantis raris e chês che a vivin nome te nestre region, po i diviers ambients di partignince, in mût di spaziâ il plui pussibil ta cheste biodiversitât maraveose: no dome la montagne ma ancje lis risultivis, i magrêts da la Celine-Midune, il Cjars. Infin si à cirût la bielesca da lis fotografii, parie cun chês da lis plantis. Lis didascalii a presentin il non sientific latin, il non talian e il non furlan, cuant che si à rivât a cjatâlu. Cul Strolc si presente ancje il Lunari da la Filologjiche, stampât cu la poie di Civibank, chest an ancje in version di taule.

